

Allannguutissatut siunnersuut

uunga

Avatangiisit innarlitsaaliorneqarnissaat pillugu Inatsisartut inatsisaat nr. xx, xx. 2011-meersoq pillugu siunnersuut.

Aappassaaneerinninnissamut Naalakkersuisuisut saqqummiussaas.

§ 28-mut

1. § 28-mi imm. 2-p kingorna immikkoortoq nutaatut ikkunneqassaaq:

“*Imm. 3.* Imermik pilersuiveqarfik § 31 malillugu imissap pitsaassusissaanut Naalakkersuisut piunasaqaatigisaanut eqqortitsinermik qulakkeerinninnaasumik imermik suliarinniffeqarpat imm. 2-mi sulianik taaneqartunik arlaannik ataatsimik arlallinnilluunniit akuersisunik Naalakkersuisut maleruagassaliorsinnaapput.”

Tamatum kingorna imm. 3 imm. 4-nngussaaq.

§ 31-mut

2. § 31, imm. 1-mi, ”katersorneqartup” imatut allanngortinneqassaaq: ”atorneqartup” imatullu oqaasertaqalerluni:

“*Imm 1.* Erngup imissatut siunertanulluunniit allanut atorneqartup, imissatullu pitsaassuseqartinneqartussap, piunasaqaatit minnerpaaffissaat Naalakkersuisunit aalajangersarneqartut naammassissavai.”

3. § 31, imm. 2, imatut oqaasertalerneqassaaq:

”*Imm. 2.* Imissatut pitsaassusilimmik imissatut siunertanulluunniit allanut atorneqartussamik imermik taratsumillu katersuineq Naalakkersuisunit akuersissutigineqassaaq.”

Allannguutissatut siunnersuummut nassuiaatit

Nassuiaatit nalinginnaasut

§ 28, imm. 3 inatsimmut atuuttumut naleqqiullugu nutaajuvoq. Nunap assersorneqarsimasup iluani, imm. 2 malillugu inerteqqutaagaluartunik, sulianik akuerisaasunik maleruagassanik aalajangersaanissamut aalajangersagaq Naalakkersuisunut periarfissiivoq, imermik pilersuiveqarfimmi imermik suliarinniffik pitsaanerulersinneqarpat.

Taamaaliortoqarnissaanulli pisariaqarpoq imissap pitsaassusissaanut Naalackersuisut piunasaqaataasa suli eqqortinneqarsinnaanerat.

§ 28, imm. 3-mi aalajangersagaq nutaaq Namminersorlutik Oqartussanut allaffissornikkut annikitsumik kinguneqartitsissaaq. Allanguineq aningaasaqarnikkut kinguneqartitsinnginnissaa nalilerneqarpoq.

§ 31 imm. 1-imi, oqaatsip ataatsip erseqqissarneqarnissaa pisariaqarsimavoq. Tamanna pivooq § 28, imm. 3-p siunnersuutigineqartutut iluarsineqartumut aalajangersagaq naleqqussarniarlugu.

§ 31, imm. 1-imi allanguut allaffissornikkut aningaasaqarnikkullu kinguneqartitsissanngilaq.

§ 31, imm. 2-mi allanguuteqarnissamut siunnersuut eqqarsaatigalugu tassani pineqarpoq aalajangersakkap siunertaanik erseqqissaaneq, imissaq tarajorlu toqqaannartumik taaneqarnissaat nalilerneqarluni, tassa imissatut pitsaassuseqartumik imiliornermut tarajoq Kalaallit Nunaanni sumiiffinni arlalinni atorneqarmat.

§ 31, imm. 2-mi allanguut allaffissornikkut aningaasaqarnikkullu kinguneqartitsissanngilaq.

Allanguutissatut siunnersuummi aalajangersakkanut ataasiakkaanut nassuiaatit

Nr. 1-imut

Nunap assersorneqarsimasup iluani sulianut akuersinerit imissamik pissarsiffissat mingutsitsinermut illersorniarlugit killilersuisumik aqunneqarsimapput, ilaatigut tassa assersuutigalugu benzinamit/uuliakoornermiit imaluunniit inuit suliaqarnerisa annertusinerini mingutsitsisoqarnerani imermik pilersuiveqarfiit manna tikillugu imissamik saliinnaasimannimmata.

Imermilli suliarinninnerup pitsaanerulersinnissaanut atortorissaaruteqarnikkut periarfissaqarpoq. Taamaattoqarsinnaappat, imissap pitsaassusissaanut § 31-mi piunasaqaatit aalajangersarneqartut suli eqqortinneqarsinnaallugit pitsanngorsaaneq qulakkeerneqarsinnaappat nunap assersorneqarsimasup iluani suliat amerlanerit akuerineqarsinnaassapput.

§ 28, imm. 3-mi aalajangersakkap nutaap imm. 2 malillugu inerteqqutaasunik sulianik akuersinnaasunik maleruagassanik Naalackersuisut aalajangersaasinnaalersippai, tassa erngup imigassap pitsaassusia aamma imermik pilersuiviit nakkutigineqarnerat pillugit Namminersornerullutik Oqartussat nalunaarutaat nr. 7, 17. marts 2008-imeersumi imissap pitsaassusissaa pillugu Naalackersuisut piunasaqaataannik eqqortitsinnaasunik imermik

pilersuiveqarfik imermik pilersuinermi naleqquttunik atortulersorneqarsimasoq
Naalakkersuisut naliliisinnaappata.

Maleruagassat nalunaarusiakkut piareersarneqassapput.

Qaqortumi imeqarfiup ingerlaqqittumik imermik suliarinnittumik imermik suliarinninerup
annertusinissaanut akuersissummik Nukissiorfiit qinnuteqarnerisa kingorna aalajangersagaq
pisariaqartinneqalerpoq, taamaalilluni imeqarfik imissatut ajornerusumik pitsaassusilimmik
imissamik saliisinnaanngorlugu, assersuutigalugu benzinamit/uuliakoormiit imaluunniit
inuit suliaqarnerisa annertusinerini mingutsitsisoqarnerani.

Qaqortumi illoqarfiup ilaa nunap assersorneqarsimasup iluaniippoq, taamaalilluni imissamik
pissarsiffiusussaq mingutsinneqarsinnaalluni tamatumalu kingunerisaanik ilaatigut nunap
assersorneqarsimasup iluani illut allilerneqaqqusaanngillat aserfallatsaaliuinernilu tamani
suliap ingerlanneqarnissaanut immikkut akuerineqarnissaq qinnutigineqartarluni,
illuliorfigineqarsinnaasullu atorineqarsinnaanatik.

Qaqortumi qangalili kissaataasimavoq imermik suliarinnittarnerup pitsaanerulersinnissaa,
taamaalilluni imeqarfik imissamik ajornerusumik pitsaassusilimmik saliisinnaanngorluni
taamaalillunilu nunap assersorneqarsimasup iluani killilersuinerit amerlanerit
sakkukillineqarsinnaallutik imaluunniit atorunnaarsivinneqarlutik.

Nunami sumiiffinni allani aamma imermik suliarinninnerup pitsaanerulernissaanik
kissaateqartoqarpoq, taamaalilluni imeqarfiup eqqaani nunat assersorneqarsimasut iluanni
suliat amerlanerusut akuerineqarsinnaalerlutik.

Nr. 2-mut

Aalajangersakkami siunertaq tassaavoq Kalaallit Nunanni innuttanut suliffissuarnullu
inuussutissalerisunut erngup minguitsup qulakkeernissaanut malittarisassaliorsinnaaneq.
Avammut niuerutigineqartussamik imermik katersineq aalajangersakkamut tassunga
ilaatinneqanngilaq.

Maleruagassaq kapitalimi maleruagassanut allanut atavoq.

Erngup imigassap pitsaassusia aamma imermik pilersuiviit nakkutigineqarnerat pillugit
Namminersornerullutik Oqartussat nalunaarutaat nr. 7, 17. marts 2008-imeersoq malillugu
erngup pitsaassusaanik nakkutillineq tassaavoq bakterianik, atortunik akuutissanillu
misissuinerit kiisalu taakku inernerinik nalilersuineq.

Imissap pitsaassusissaanut tunngatillugu inatsisinut imissap pitsaassusissaa pillugu EU-mi
peqqussut nr. 98/83/EF 3. november 1998-imeersumi tunngaviit tunngavigineqarput.

Innuttaasut peqqissuunissaat eqqarsaatigalugu kiisalu erngup tamarmi, inuussutissanut attuisup, pitsaassusissamut piumasqaatinik qulaani taaneqartunik eqqortitsinissaa pillugu inatsisit atulersinneqarput.

Misissueqqissaarnermut ilaapput tappiorannartunik uumassusilinnik, kiisalu atortunut akuutissalinnut tunngasut sumiiffinnullu ataasiakkaanut naleqqussarneqarsimallutik. Tamatumunnga tunuliaqutaasoq tassaavoq nunap assersorneqarsimasup iluani pissusissamisoortunik pissuseqarsinnaammat, imissap pitsaassusaata ajornerulerneranik kinguneqarsinnaasunik, soorlu aamma inuit suliaqarsinnaasut imissap mingutsinneqarnissaanut aarlerinartuusinnaasunik.

Malugineqassaaq tappiorannartunik uumassusilinnik nakkutilliineq Namminersorlutik Oqartussat Inuussutissalerinermut Immikkoortortaqarfianit isumagineqarpoq. Inuussutissanik nersutillu nappaataannik inunnut tunillaassorsinnaasunik nakkutilliineq pillugu Inatsisartut peqqussutaata allanngortinneqarneranik Inatsisartut peqqussutaat nr. 9, 31. maj 2001-imeersumi § 1, imm. 1 naapertorlugu malittarisassaliaq imatut oqaasertalerneqarsimavoq:

" Inatsisartut peqqussutaanni ilaatinneqarput inuussutissat, nersutit nappaataat inunnut tunillaassorsinnaasut, taamatuttaaq perlerorneq trikinillu, imermik imerneqartartumik imermillu nalunnermut atorneqartartumik tamanut atorneqarsinnaatitaasumik uumassusilinnut tappiorannartunut tunngatillugu pitsaassusissaaq kiisalu imermik suliarinniffiusartunik imeqarfinnullu teknikikkut eqqiluisaarnissakkullu aaqquussisarneq pillugit misissuisarneq, akuersissuteqartarneq nakkutilliinerlu."

Atortunik akuutissanik nakkutilliineq Nunamut Namminermut, Pinngortitamut Avatangiisinullu Naalakkersuisoqarfimmit isumagineqarpoq. Atortunut akuutissanut tunngatillugu imeq uumassuseqartunut uumassuseqanngitsunullu arlalinnut misissoqqissaarneqartussaavoq. Tassunga ilanngutissaaq takussutaasinnaasut peqqinnissamullu tunngasut immikkoortinneqarnissaat.

Takussutaasinnaasunut tunngasuniipput imissamut atortussiat pissusissamik akooreersut. Taratsunik savinernik pissusissamisoortumik akooreersut tassangaannartumik allanngornerisa takutissinnaavaat imissaq mingutsinneqarsimasoq.

Peqqinnissamut tunngasuniipput atortussiat arlaatigut mingutsitsisoqarneranut takussutaasinnaasut soorlu assersuutigalugu ikkussukkani manngertorneq aamma/imaluunniit nunap assersorneqarsimasup iluani suliat, qaangiisoqarneratigut peqqinnissakkut aarlerinartorsiortitsisinnaasut. Matumani pineqartoq ullumikkut imeqarfiit imissamik uuliaqartunik il.il. mingutsinneqarsimasumik imermik suliarinnissinnaannginnerinik assersuukkaanni taamaalilluni nunamut assersorneqartumut immikkut akuersisarnerit killeqartumik aqunneqartariaqarput.

Nakkutilliineq, misissueqqissaarnerit, imissamik pissarsiffiusunik nutaanik atulersitsineq, immikkut akuersinissamut periarfissat, imermik misiligutissanik tiguisarnerit akulikinnissaat, peqqussutit inerteqqussutillu erngup imigassap pitsaassusia aamma imermik pilersuiviit nakkutigineqarnerat pillugit Namminersornerullutik Oqartussat nalunaarutaat nr. 7, 17. marts 2008-imeersoq malillugu ingerlanneqarput.

Nr. 3-mut

Imm. 2-mut

Aalajangersakkami siunertaq tassaavoq imissamik pissarsiffissap nutaap atulernissaa sioqqullugu akuerineqartarnissaata qulakkeerneqarnissaa. Tamanna imermut atuuppoq, kisianni aamma taratsumut.

Imissamik pissarsiffissap nutaap akuerineqarnissaanut tunuliaqutaasoq tassaavoq tatsit imissaqarfiit ajornartorsiutaasinnaasut atorneqarnissaasa pinngitsoortinnissaat taamaalillunilu tamatuma kingorna annertuumik imermik suliarinnittoqarneranik malitseqarluni. Erngup pitsaassusaata ajornerulerneranut assersuutit tassaapput:

1. tatsip imissaqarfiup ikkappallaarsinnaanera, taamaalilluni assersuutigalugu Erngup killingata qaffattarneratigut appartarneratigullu aamma tatsimi naasut annertusinerisa kingunerisaanik erngup pitsaassusaa ajornerulersinnaalluni.
2. imissap pitsaassusaata pissusissamisoortumik ajornerulersinnaanera assersuutigalugu marrarmik kuutsitsivigineratigut, imaluunniit
3. piffimmi imissamik pissarsiffigineqarsinaasup iluani suliaqartoqarneratigut.